

出家念二者不亂念三者不賊害念亦復謂正見正念正說正意正行正方便正志正定所謂兩道者謂人所疑所說溪谷者謂瞋恚所說叢樹者謂五樂一者眼樂色愛欲可以好色貪著二者耳樂聲三者鼻樂香四者舌樂味五者身樂細軟愛欲可以好色貪著所說聚鄉郡縣國者謂無為德佛告聽施是諸佛事我以悲心故說是其欲度脫者我已憇傷之今彼是若事當以寂靜樹下空閑一處一心體行若山澤冢間當以果蓏為食比丘

莫貪恣於世間居後悔之是諸佛行亦諸佛教今佛已說是賢者聽施便歡喜思惟佛所說

佛說比丘聽施經

佛說畧教誡經

唐三藏法師義淨奉 制譯

如是我聞一時佛在室羅筏城逝多林給孤獨園與無量苾芻眾俱爾時佛告諸苾芻汝等當知於我法中有少欲知足活命之事謂

我弟子剃髮染衣持鉢巡家乞食自濟世間
愚人之所輕慢若有淨信善男子離俗出家
修行此事不爲王難所逼迫故不爲賊怖負
債驚恐不存活故但爲發心於生老病死憂
悲苦惱生厭離故欲斷苦蘊煩惱纏縛盡其
邊際求解脫故汝等豈非爲此事故而求出
家時諸苾芻白佛言世尊如是如是爲解脫
故而求出家汝等苾芻如有一類罪惡苾芻
雖復出家性多貪染於五欲境深生戀著或
起瞋恚生惡尋思心恒放逸不勤策勵常多

忘念不習定門攀緣諸境樂下劣事不希勝
行終無所獲此之惡人猶如何等汝諸苾芻
聽說譬喻如野田中焚死屍木兩頭俱燒中
間穢汙此木不堪聚落中人及野田人之所
受用我今以此喻彼一類出家懈怠愚癡之
人棄捨俗間諸快樂事沙門義利復不修習
恒生三種不善思惟所謂思惟五欲思惟瞋
害思惟欺誑此之三種不善思惟因何而起
當知皆以無明爲因而得生起身壞命終墮
三惡趣是故汝等應勤修習除斷無明我是

大師汝是弟子於我教中要畧之事今為汝
說由大悲故由哀愍故為利益故為勝樂故
如我所說汝等應修若在山林蘭若樹下或
在露地汝可善思不應放逸勿於後時心生
悔恨如說修行當得解脫爾時世尊說是語
已諸苾芻眾歡喜奉行

當四

九

佛說畧教誡經

佛說療痔病經

唐三藏法師義淨譯

如是我聞一時薄伽梵在王舍大城竹林園
中與大苾芻眾五百人俱時有眾多苾芻身
患痔病形體羸瘦痛苦縈纏於日夜中極受
憂惱時具壽阿難陀見是事已詣世尊所頂
禮雙足在一面立白佛言世尊今王舍城多
有苾芻身患痔病形體羸瘦痛苦縈纏於日
夜中極受憂惱世尊此諸病苦云何救療爾
時佛告阿難陀汝可聽此療痔病經讀誦受